



**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ԱՐԴԱՐԱԴԱՏՈՒԹՅԱՆ ՆԱԽԱՐԱՐՈՒԹՅԱՆ
ԻՐԱՎԱԲԱՆԱԿԱՆ ԱՆՁԱՆՑ ՊԵՏԱԿԱՆ ՌԵԳԻՍՏՐԻ
ԳՈՐԾԱԿԱԼՈՒԹՅԱՆ ՊԵՏ**

0051 ք. Երևան, Կոմիտաս 49/3
հեռ (+374 10) 201461

ՈՐՈՇՈՒՄ

Գրավոր ընթացակարգ կիրառելու մասին

19.07.2019թ.

ք. Երևան

Հայաստանի Հանրապետության արդարադատության նախարարության իրավաբանական անձանց պետական ռեգիստրի գործակալության (այսուհետ՝ Գործակալություն) պետ Արմեն Առաքելյանս, ուսումնասիրելով քաղաքացի Գրիգոր Գրիգորյանի 2019 թվականի հուլիսի 19-ի դիմումը, ինչպես նաև «Հայաստանի խուլերի միավորում» հասարակական կազմակերպության (այսուհետ՝ Կազմակերպություն) կանոնադրության փոփոխության պետական գրանցում կատարելու վերաբերյալ Կազմակերպության նախագահի 2019 թվականի հուլիսի 18-ի դիմումի հիմքով հարուցված վարչական վարույթի նյութերը.

ՊԱՐԶԵՑԻ

1. Կազմակերպության նախագահ Մարինե Հարությունյանի կողմից 2019 թվականի հուլիսի 18-ին Գործակալությունում թղթային կրիչով մուտքագրվել է Կազմակերպության կանոնադրության պետական գրանցում կատարելու վերաբերյալ դիմումը: Դիմումին կից ներկայացվել են «Իրավաբանական անձանց պետական գրանցման, իրավաբանական անձանց առանձնացված ստորաբաժանումների, հիմնարկների և անհատ

ծեռնարկատերերի պետական հաշվառման մասին» օրենքի (այսուհետ՝ Օրենք) 39-րդ հոդվածի 1-ին մասով նախատեսված հետևյալ փաստաթղթերը.

1. պետական տուրքի վճարման թիվ 53129561 անդորրագիրը,
2. 2019 թվականի հուլիսի 18-ի արտահերթ համագումարի արձանագրությունը,
3. կանոնադրության փոփոխության 2 օրինակ:

Վերը նշված փաստաթղթերից բացի, ներկայացվել են նաև 1 աշխատանքային օրվա ժամկետում պետական գրանցում կատարելու համար լրացուցիչ վճարված 30.000 ՀՀ դրամի չափով արտաբյուջետային վճարի թիվ 72569686 կտրոնը:

2. 2019 թվականի հունիսի 19-ին Գործակալություն է մուտքագրվել քաղաքացի Գրիգոր Գրիգորյանի դիմումը՝ հետևյալ բովանդակությամբ. «Սույն թվականի հուլիսի 18-ին ոչ մի համագումար կամ ժողով տեղի չի ունեցել: Խուլերը այդ մասին ոչինչ չեն լսել և չեն ծանուցվել:...Համագումար անցկացնելու վերաբերյալ ներկայացված փաստաթղթերը կեղծ և ապօրինի են, որը Կազմակերպության շահերից չի բխում»: Վերոգրյալի հիման վրա Գ. Գրիգորյանը խնդրել է ընթացք չտալ ներկայացված, ըստ դիմումի՝ կեղծ փաստաթղթերին:

3. 2019 թվականի հուլիսի 4-ին Գործակալությունում թղթային կրիչով մուտքագրվել է Կազմակերպության կանոնադրության փոփոխության պետական գրանցում կատարելու վերաբերյալ Կազմակերպության նախագահ Մարինե Հարությունյանի դիմումը: Դիմումին կից, որպես Օրենքի 39-րդ հոդվածի 1-ին մասով պահանջվող փաստաթուղթ, ներկայացվել է նաև Կազմակերպության 2019 թվականի հուլիսի 3-ի արտահերթ համագումարի արձանագրությունը՝ կանոնադրության փոփոխության հաստատման մասին որոշումով: Գործակալության պետի ժամանակավոր պաշտոնակատարի 2019 թվականի հուլիսի 12-ի թիվ 211-Մ-05 որոշմամբ մերժվել է Կազմակերպության կանոնադրության փոփոխության պետական գրանցումը:

4. Այնուհետև, 2019 թվականի հուլիսի 15-ին Գործակալությունում թղթային կրիչով մուտքագրվել է Կազմակերպության կանոնադրության փոփոխության և լրացման պետական գրանցում կատարելու վերաբերյալ Կազմակերպության նախագահ Մարինե Հարությունյանի դիմումը:

Դիմումին կից, որպես Օրենքի 39-րդ հոդվածի 1-ին մասով պահանջվող փաստաթուղթ, կրկին ներկայացվել է Կազմակերպության 2019 թվականի հուլիսի 3-ի արտահերթ

համագումարի արձանագրությունը՝ կանոնադրության փոփոխության և լրացման հաստատման մասին որոշումով: Գործակալության պետի ժամանակավոր պաշտոնակատարի 2019 թվականի հուլիսի 16-ի թիվ 211-Մ-06 որոշմամբ մերժվել է Կազմակերպության կանոնադրության փոփոխության և լրացման պետական գրանցումը: Նշված փոփոխության պետական գրանցման մերժման իրավական հիմք է հանդիսացել այն, որ 2019 թվականի հուլիսի 12-ի թիվ 211-Մ-05 որոշմամբ ամրագրված փոփոխության պետական գրանցման մերժման հիմքերը վերացնելու և կրկին կանոնադրության փոփոխություն հաստատելու համար անհրաժեշտ է հրավիրել նոր արտահերթ համագումար: Սակայն, 2019 թվականի հուլիսի 4-ի դիմումին կից Գործակալություն ներկայացված 2019 թվականի հուլիսի 3-ի արձանագրության և կանոնադրության փոփոխության և լրացման տեքստում շտկումներ են կատարվել և կրկին ներկայացվել փոփոխության պետական գրանցման, որով խախտվել էր «Հասարակական կազմակերպությունների մասին» օրենքով և Կազմակերպության կանոնադրությամբ Կազմակերպության փոփոխությունների համար սահմանված կարգը:

5. Կազմակերպության նախագահ Մարինե Հարությունյանը Գործակալության պետի ժամանակավոր պաշտոնակատարի 2019 թվականի հուլիսի 16-ի թիվ 211-Մ-06 որոշումը Գործակալությունից առձեռն ստացել է 2019 թվականի հուլիսի 16-ին:

Պատճառաբանություններ և եզրահանգումներ.

Օրենքի 43-րդ հոդվածի 1-ին մասով սահմանված են իրավաբանական անձի փոփոխությունների պետական գրանցումը մերժելու հետևյալ իրավական հիմքերը՝

1) իրավաբանական անձի փոփոխությունների՝ Օրենքով կամ կանոնադրությամբ սահմանված կարգի խախտումը.

2) Օրենքով և այլ օրենքներով սահմանված փաստաթղթերը չներկայացնելը կամ ներկայացված փաստաթղթերի անհամապատասխանությունն օրենքին կամ իրավաբանական անձի ներկայացրած այլ փաստաթղթերին.

3) առկա է իրավաբանական անձի փոփոխության գրանցումն արգելող կամ սահմանափակող՝ դատարանի համապատասխան որոշում կամ վճիռ:

Օրենքի 20-րդ հոդվածի 24-րդ մասի համաձայն՝ որևէ անձի գրավոր դիմումի առկայության դեպքում, որի համաձայն գրանցման ներկայացված փաստաթղթերում զետեղված փաստերը չեն համապատասխանում իրականությանը, գրանցումը մերժելու **ակնհայտ հիմքերի բացակայության դեպքում** պարտադիր իրականացվում են լումներ կամ գրավոր ընթացակարգ:

Կազմակերպության նախագահ Մարինե Հարությունյանի 2019 թվականի հուլիսի 18-ի դիմումի և դիմումին կից ներկայացված փաստաթղթերի ուսումնասիրության արդյունքում պարզվել է, որ Օրենքի 43-րդ հոդվածի 1-ին մասով սահմանված կանոնադրության փոփոխության պետական գրանցումը մերժելու **ակնհայտ հիմքերը բացակայում են:**

Օրենքի 5-րդ հոդվածի 1-ին մասի համաձայն՝ պետական գրանցման համար դիմած անձի կողմից ներկայացված տեղեկատվությունը, բացառությամբ նույն հոդվածի 3-րդ մասով նախատեսված դեպքերի, Գործակալությունը համարում է արժանահավատ: Նույն հոդվածի 3-րդ մասի համաձայն՝ անձանց կողմից Գործակալություն ներկայացված տեղեկատվությունը կարող է համարվել անարժանահավատ, եթե կա դա փաստող ապացույց կամ այլ անձանց ներկայացրած տեղեկատվություն: Օրենքի 20-րդ հոդվածի 2-րդ մասի համաձայն՝ գրանցման գործընթացում իրականացվում են լումներ, երբ առկա է այլ անձի գրավոր դիմում կամ հաստատված աղբյուր ունեցող այլ տեղեկություն, որը վիճարկում է պետական գրանցման համար էական որևէ փաստի գոյությունը կամ հավաստիությունը: Նույն հոդվածի 18-րդ մասի համաձայն՝ Գործակալությունը կարող է լումները փոխարինել գրավոր եղանակով հանգամանքների պարզման ընթացակարգով (այսուհետ՝ գրավոր ընթացակարգ): Օրենքի 20-րդ հոդվածի 24-րդ մասի համաձայն՝ որևէ անձի գրավոր դիմումի առկայության դեպքում, որի համաձայն գրանցման ներկայացված փաստաթղթերում զետեղված փաստերը չեն համապատասխանում իրականությանը, գրանցումը մերժելու **ակնհայտ հիմքերի բացակայության դեպքում** պարտադիր իրականացվում են լումներ կամ գրավոր ընթացակարգ: Վերը նշված իրավական նորմերից հետևում է, որ Գործակալություն ներկայացվող փաստաթղթերը համարվում են արժանահավատ, քանի դեռ չկա հակառակը փաստող ապացույց կամ տեղեկատվություն: Եթե այլ անձի գրավոր դիմումով կամ հաստատված աղբյուր ունեցող տեղեկությամբ

վիճարկվում է պետական գրանցման համար էական փաստի գոյությունը կամ հավաստիությունը, ապա գրանցման վարույթի շրջանակներում իրականացվում են լուծմանը կամ գրավոր ընթացակարգ:

Գործակալության պետին ուղղված քաղաքացի Գրիգոր Գրիգորյանի 2019 թվականի հուլիսի 19-ի դիմումով վիճարկվում է պետական գրանցման համար էական փաստի՝ Կազմակերպության 2019 թվականի հուլիսի 18-ի արտահերթ համագումարի հրավիրված լինելու հանգամանքը:

Հետևաբար, անհրաժեշտ է իրականացնել գրավոր եղանակով հանգամանքների պարզման ընթացակարգ, որի միջոցով ենթակա են պարզաբանման հետևյալ հանգամանքները.

- Կազմակերպության նախագահ Մարինե Հարությունյանի կողմից 2019 թվականի հուլիսի 18-ի դիմումին կից Գործակալություն ներկայացված Կազմակերպության 2019 թվականի հուլիսի 18-ի արտահերթ համագումարի արձանագրությունը արդյո՞ք հանդիսանում է Կազմակերպության՝ Մարինե Հարությունյանի դիմումով հայցվող կանոնադրության փոփոխությունների պետական գրանցման համար անհրաժեշտ լիազորված մարմնի որոշում:

- Կազմակերպության կողմից արդյո՞ք պահպանվել է Կազմակերպության՝ «Հասարակական կազմակերպությունների մասին» օրենքով և Կազմակերպության կանոնադրությամբ Կազմակերպության կանոնադրության փոփոխությունների համար սահմանված կարգը:

Ելնելով վերոգրյալից և ղեկավարվելով Օրենքի 20-րդ հոդվածի 2-րդ և 18-րդ մասերով՝

ՈՐՈՇԵՑԻ

1. «Հայաստանի խուլերի միավորում» հասարակական կազմակերպության կանոնադրության փոփոխության պետական գրանցում կատարելու վերաբերյալ Կազմակերպության նախագահ Մարինե Հարությունյանի 2019 թվականի հուլիսի 18-ի դիմումի հիմքով հարուցված վարչական վարույթի շրջանակներում իրականացնել գրավոր

եղանակով հանգամանքների պարզման ընթացակարգ (այսուհետ՝ Գրավոր ընթացակարգ):

2. Կազմակերպության նախագահ Մարինե Հարությունյանի 2019 թվականի հուլիսի 18-ի դիմումի հիմքով հարուցված կանոնադրության փոփոխության պետական գրանցման վարչական վարույթի ժամկետի ընթացքը կասեցնել 20 օրով:


3. Գրավոր ընթացակարգի իրականացումը հանձնարարել Հայաստանի Հանրապետության արդարադատության նախարարության իրավաբանական անձանց պետական ռեգիստրի գործակալության հասարակական միավորումների գրանցման բաժնի պետ Հարություն Խուդգարյանին և նույն բաժնի գլխավոր մասնագետ Լալա Ներսեսյանին:

Սույն որոշումն ուժի մեջ է մտնում վարույթի մասնակիցներին այն հանձնելուն հաջորդող օրվանից և օրենքով սահմանված կարգով ենթակա է բողոքարկման Հայաստանի Հանրապետության արդարադատության նախարարին կամ Հայաստանի Հանրապետության վարչական դատարան՝ որոշումն ուժի մեջ մտնելու օրվանից 2 ամսվա ընթացքում:

7/19/2019

X 

ԱՐՄԵՆ ԱՌԱՔԵԼՅԱՆ



ԱՐՄԵՆ ԱՌԱՔԵԼՅԱՆ